

Wanem ia La Niña mo wanem nao olgeta efekt hemi gat long Vanuatu?



La Niña hemi rilet long bigfala kolkol long sefes blong s olwota long sentrol mo is blong tropikol Pasifik i go long kost blong Saot America.

Plante taem i mekem ren i foldaon bitim averej ova long plante pat blong Vanuatu long sisen blong ren (Novemba kasem Eprel) mo drae sisen (Mei kasem Oktoba).

Olgeta tropikol saeklon i stap hapen plante taem long taem blong La Nina mo i stap fom oltaem long wes blong kaontri.

La Niña hemi hapen evri 3-5 yia mo i save stap kasem tu (2) yia o moa. Hemi kosem flading, lanslaed, damej long olgeta komuniti mo infrastrakja, karem fulap bebet mo olgeta disis long olgeta plant mo inkrisim olgeta sik blong moskito mo sik we i pass tru long wota (wotabon).

Taem yumi andastanem La Niña, yumi save helpem olgeta kominiti blong pripea gud blong katem daon risk mo lusum laef.



Wanem nao i kosem La Niña?




La-Niña hemi pat blong wanem we oli kolem Southern Oscillation Index.

Simpol wei blong andastanem La Niña hemi tru long muvmen blong wom wota long is kasem wes blong Pasifik Osen.

Top leya blong tropikol Pasifik Osen (kolosap long fes 200 meta) i wom, wetem tempereja blong wota bitwin 20°C mo 30°C. Andanit long solwota, i gat wan tempereja we i moa kolkol mo i no jenis.

Olgeta win ova long tropikol Pasifik, we oli kolem tred win, i blo long is (Saot America) i go long wes (Australia) mo i putum tugeta top leya blong olgeta wota we i wom agensem is kost blong Australia mo Indonesia. Yes, level blong solwota kolosap long Australia i save stap wan mita hae bitim hemia long Saot America.

Wom wota tugeta wetem win oli mekem ren. Wetem La Niña, olgeta win tred i bildimap olgeta mo karem moa wom wota i go long Wes blong Pasifik mo i inkrisim olgeta totol blong ren blong yumi.



Olsem wanem nao bae yu redi from La Niña?

La Niña i bin stap tekem ples ova long 100 yia finis, mo oli stap talem se bambae hemi go moa nogud anda long klaemet jenis.

Be naoia we yumi no save stopem olgeta flad we El Niño i kosem, yumi save pripea from olgeta blong mekem se oli no save gat tumas impak long wanem we yumi mekem.

Stap Helti oltaem

Long taem blong La Niña, flading i save afektem olgeta wota sos mo kontaminetem wota saplae, we i save lid i go long aotbrek blong olgeta sik olsem 'typhoid' (man i kasem fiva, i traot mo bel iron) mo 'scabies' (sikras mo skin rash).

Blong protektem olgeta wota saplae mo mentenem helt:

- Storem plante klin wota.
- Kavaremap olgeta wota tank mo leftemap olgeta wol blong wel blong kipimaot olgeta toti mo stopem kontaminesen blong wota.
- Mekem sua se olgeta drenej blong wota raon long haus blong yu oli klia blong wota i save kamaot isi long hem.
- Klinim olgeta eria we i gat moskito.
- No mas swim long riva long taem blong flad o stret afta long flad.
- Mekem sua se yu usum ol wud we ino usumap tumas wota.





Planem olgeta kakae

Long taem blong La Niña, i save gat olgeta aotbrek blong olgeta sik, mo olgeta animol olsem olgeta rat we oli save spoilem olgeta kakae.

Blong pripea, olgeta fama oli save:

- Sakem asis blong faea long olgeta vegetebol mo miksim i go long graon olsem wan naturol sabstens we i save kilim bebet.
- Karemaot olgeta branj o plant we i gat disis o bebet i afektem.
- Kavaremap olgeta hip blong olgeta frut (olsem banana, guava mo samfala moa) wetem olgeta plastik bag blong stopem olgeta bebet blong oli no spoilem.
- Muvum Karen blong taro i go long wan ples we i stap longwe long hevi flading olsem antap long wan hil.
- Mekem sua se wota i save kamaot isi long olgeta kakae blong stopem bebet i no kakae olgeta



Manejem laefstok

La Niña i save kosem plante long olgeta problem long olgeta animol we i inkludum aotbrek blong olgeta sik mo olgeta bebet.

Blong pripea, olgeta fama oli save:

- Karemaot olgeta animol long eria we i save gat flad.
- Mekem sua se olgeta animol oli stap long wan helti kondisen mo gat akses long klin wota.
- Planem olgeta kaen gras we oli save drink wota, olsem papolo, bin.
- Stikim olgeta animol long meresin blong protektem olgeta long olgeta wom.
- No miksim olgeta buluk mo hos blong stopem spread blong olgeta hosflae.
- Blong faet agensem sik we i stap mekem andanit blo leg blong buluk i roten, putum olgeta ston insaed long padok blong save stretem andanit blong leg blong buluk.



Mentenem Forestri

Tumas ren i save afektem grot blong olgeta yangfala plant.

Olgeta maneja blong Forestri oli save:

- Planem olgeta kaen tri we oli isi blong stap long wota long eria we i save gat flad; olsem kokonas, bambu, purao.
- No klinim olgeta vegetesen we oli stap long hil.
- Mekem drenej bitwin olgeta plant blong stopem wota blong i no stap nomo long wan ples.
- Karemaot olgeta tri we oli nogud mo ded blong stopem spread blong olgeta sik.
- Aplaem olgeta kemikol tritmen long mol.
- Mentenem gudfala pasej blong olgeta strim mo riva.

Blong karem moa infomesen long preperesen blong La Niña, plis visitim:

<http://www.vmgd.gov.vu>

Telefon: **24686**

Imelem: climate@meteo.gov.vu

Port Vila,

Ripablik blong Vanuatu



Vanuatu Meteorology & Geo-hazards Department



La Niña: Taem blong ren mo flad

